



李叔則曰事奇筆健遂為此題絕唱  
奇思妙理

### 和杜後乞食

魏晉有佳士孤行吟來遲神農虞夏邈歸去柴桑  
涯五柳振高風義熙乞食時當其辭五斗甘餓首  
陽遠甚餓自沿門祿食等鼠鴟所以百世稱高蹈  
不憂飢今茲乞食者浩歌豈朶頤徘徊江漢間載  
賡陶公詩夏雲聽黃鳥春草生塘池曠焉追千古  
白雲不盡辭

李叔則曰前以古人為咏略用數語補入今人  
有法有體清煉之極平淡古雅



和泛舟 叔則

泛棹揚關外夾河搖岸柳一樽宣城釀女真自名  
 酒酒名我昔在宣城入唇得未有別來歲七更為  
 時亦已久聲氣感李子枯腸須我友詩卷江東來  
 春鶯遠求偶蔡子携詩卷求李子題推窓青山入相看各白  
 首佳句頻飛觥殘肴止有藕猶記李白詩殷勤在  
 紀叟

李叔則曰澹宕清真

暗結應前妙

和登塔 叔則

青山一水裏浮屠三汊間縱目九霄上平臨萬仞  
 山飛空低過鳥認佛題慈顏柳結金絲絡雲垂片  
 野閒極天麥覆隴估客時往還碧草遠影盡長江  
 北固灣白雲揖作客殊慚鷗鷺班法雨注西極荆  
 棘不用刪待得合尖後扶筇再來攀 時塔未成

雪浪石 其色如漆其紋如銀不知所出殆神物也

中山有奇石雪浪辟雍開 在學宮 雲樹蒼古道滹沱

西南來太行亘天脊飛來 恒岳有飛來石 傍金臺浩氣盤

卷石波濤隱峽雷驪龍抱玄珠江雪翻瓊堆元化



混沌合銀潢屈注眩想像支機物不讓補天材奇  
石有奇理永昭河朔才覆以坡仙竹遊人目幾回

李叔則曰因石忽入山川大奇  
公意謂山川生石的有根據

遊天中塔限十四韻

獨步層霄上高塔雲影齊孰是襄城野忽作七聖  
迷錯看子午路遙指是竹西江漢一衣帶漕渠帝  
里谿濬淺通鉄爪築壩去淤泥春鶯轉上苑芳草  
兩岸萋欵乃餘波裏竹篷叫午鷄畏寒尚帶帽就  
煖袍仍緜柳拂臨水堰花明望春閨梅花看欲落

桃李半成蹊極目郊原迫捨舟一枝藜綠野卧犢  
鳴古寺老鶴栖久羈塵網内雲水和天倪忽道歸  
去好驚聞子規啼

李叔則曰限韻以自朕入殼公于此道深矣

憶花朝

去年花朝日園花我曾探玉蘭開半落梅杏吐初  
酣日影雲光薄山青柳色涵島落池塘月樹映嶺  
頭嵐風寒半扃户酌酒剖黃柑今年花朝日屈指  
三又三片花未入眼寂寞空兢兢不見鶯求友如



僧坐一龕幸有寶珠茶花紅火如曇山蘭秀數莖  
清芬一室含頗可慰岑寂勿事外物貪

李叔則曰意高則靜筆老則輕此等詩唐人可  
並有矣不但知足寔有享福

哭南大司馬同年仇庸足

二月十六夜忽夢庸足卧病在床數蒼頭環  
侍號予就視絕而復甦者再寤而向妻子驚

泣適

陳閔使君家報到先生已逝矣噫嘻異哉

二月既望夜司馬入夢期不見月照梁撫牀若有

思青衣三四使環侍泣陳詞沉暝悼已逝號呼乞  
延醫如是頻至再歿別復生離先生豈有恨一語  
不及私寤而生嗟異十年江之湄先生筦南戶山  
水共委蛇再參留機務夾輔無差池晚際鼎革運  
人隔齊楚涯予曩在淮上馳書訂茅茨自言弟兄  
老相見無多時况是一郡中日昃聊共嬉感予銘  
肺版風煙未遑馳先生自矍鑠艱頓病日衰藥酒  
間關訊庶幾保黃耆聞道稍能健自鄉復近陴周  
歷省部間建牙禦東陲曾鎮州垂老猶孺慕司馬六  
十家務



猶稟於母孝行實可師八袞登大年玉樹秀晚枝先生  
有何恨九泉別相知披衣叩關使得報已仙之素  
車遲千里何以慰我悲幽明雖異路神感真是奇  
古人有死友慨咨今為誰

李叔則曰生死交情俱見一夢事奇詩更奇元  
白同夢古人殆非偶然

疊一句應前  
未更遠

憶大司寇憲葵王老師 諱紀芮城人

我慕王夫子清貞是吾師秉鉞恒河上蕪蕪麥飯  
涯青宮爭國本擎天夾日奇 公為儀即上  
疏早定儲位簡在

神宗心畿南鎖鑰委是時初縮綬贊皇分一枝庭  
謁一堂上光風霽月披枳棘大賢嘆深蒙國士知  
退而上條議賈生治安咨敬獻救荒策泥舟活飢  
疲劇邑南宮調金石不可移卓异并畿南特疏非  
為私東南民力殫督漕老成資再晉大司寇清風  
兩袖馳我亦蹇儀曹鉢傳步趨隨先生秉國是批  
鱗跨驢透大明三叩頭 革戢為民大明門  
叩頭騎驢出城 優游芮  
之湄今時歷三紀九原但荒碑梁木頽哲人慨慷  
切深悲



李叔則曰清貞矣又爭國本此大臣之大節也  
公不輕許一人深得衡鑒之正故知其言之  
不誣  
章法句法聲調旨趣無一不老  
清貞  
久而不忘乃真知己

大司空劉方瀛 諱廷无平湖人

驄馬按畿日聲名北斗齊憂時成不寐五夜怯聞  
鷄服食石蓮實浩氣如虹霓察吏懸秦鏡羣材供  
所題曲陽奏最日恒嶽一攀躋我我天人相松栢  
白雲西馳書薦分闈界我桃李蹊用意一何厚緇  
衣深見携國是紛拏日忠信獨不迷一卧滄江晚

三朝日以睽昔爭邪正目曖昧到宮闈臣子標忠  
讜君父困蒺藜司空晚出山國運已有鐫凌夷權  
闕禍人才委沙泥星星至燎原應抱陸沉淒

李叔則曰篇中前序相與之情尚在所輕歸於  
國運獨感此公之晚出憂國忠愛持議公平  
可當史讀可為龜鑑真杰作也  
愛其人因及其服食愛之至也  
忠信接紛拏有深旨

大宰張

明運嘆式微風雲起金陵江河驟狀溢 時運漕俱滿 東  
南王氣蒸安石久不起綠野飽芰菱一水丹徒外



京口半舫登

相晤在舟中

用人在求舊弓旌不時膺我

僑淳化鎮驛舍執手升共洒新亭淚佐銓切飲冰

將伯求予助為郎白首憎南璽仍視選常少懼負

乘

時以璽卿閑住故以常少管文選起

與朝在草創仕路日以增統

均久虛席

宸眷日以凝天心不悔禍羣情日以

兢謁陵中道返邊報日以曹君臣矢死守豈料出

帝騰中夜人無知晨起各潛翻太宰鷄籠寺事急

且投僧丹衷填憤氣從容就脰繩一身報國畢千

秋節烈稱六月我憑吊芳魂足可徵

盛暑尸不壞

李叔則曰丹陽死官與貴陽自分天壤

起得悲涼音節淒楚

### 和古二十五首

旅舍無事閑閱李于鱗古詩刪除漢外見六

朝諸作沉思麗情曠致逸才實為唐人五言

古絕之祖耳食者以為六朝無詩誤矣因取

其可和者得二十餘首聊誌高山不能遍及

也

和稽康與阮德如 魏



有晉謀代魏志士切心肝幸遇賢數子騷屑訂金  
蘭濁世難莊語放浪一室歡良時惜易逝念往祇  
增嘆賦才固未易學煨亦殊難寄身天地間五達  
有聖言吸髓寡仙分彈琴樂泥蟠曠跡遁軒冕誰  
為櫻世患與子併明德形分神豈狀世遠乏高尚  
無人慕黃軒日夕三四飲埋照得所安忽然舍我  
去含哀誰忍攀君其慎滅性禮文緣情寬鳳德不  
他求把臂尚可完路岐途多窮情至風易寒日月  
普同照逃矣各含酸

柳鳳詹曰風期自尚  
李叔則曰良人得其玉君子得其粟此歸藏之

餘也以似此篇

### 和陳思王植三良詩

三良秦之望全秦倚以安如何秦穆死一朝并命  
殘天王業委轡霸主恣其患死殉尚無知生殉良  
獨難百身不能贖國人發長嘆始終在忠義天道  
應好還千載歌黃鳥掩泣摧心肝

柳鳳詹曰黃鳥悲鳴千秋同慨  
李叔則曰天道好還一語非為三良乃以為為

君者針砭



和應璩百一詩

墮地礪前期壯猷盟厥初直道同三黜貝錦巧砌  
誣執節甘自廢落落適里閭下車晏後堂不肯泣  
前魚一二田舍翁晨夕共草廬桑麻話且長伴閑  
山水居人生會有役腐儒事詩書少游騎款段安  
用馳名譽百年同旦暮轉眼俱已虛栖栖江水頭  
遑遑將奚如

柳鳳詹曰曠遠如讀淵明詩李叔則曰昔人之痛中丞之温各有其至

和阮瑀七哀詩

得意途難再大福不易來落葉墜高枝薪樵煨作  
灰生來在華屋掩閉泣黃臺萬事不可陳托體同  
蒿萊巧拙俱無論偃仰將誰能夜台無是非有酒  
徒盈杯

柳鳳詹曰劉腸慈願李叔則曰凄苦乃能平情非云哀而傷也

和王粲公讌詩

當塗邀天眷國勢日歲蕤西園集飛蓋賓客咏光  
暉淒楚筑筑子飛鳥依華榭鄴下富才士清秋酌  
金壘公庭萬舞奏樂至有餘悲飛竿擣華藻文行



杯不遲明星爛東方客醉忘夜歸主人喜厭厭四  
座莫肯違翻思登樓日國士其屬誰去害便為福  
四海室家綏南山誦主人極天亨巍巍几几望周  
公忠蓋遐不追

柳鳳詹曰仲宣本秦川貴族遭亂流寓自傷公  
讌詩獨和平容與寄悠思於言外思皇先

生類仰今昔有同愼焉是為并美  
李叔則曰仲宣之時鼎分三足將相之才無國

無之公讌之篇意寄深遠先生和之其亦  
有登樓之感乎

咏懷七首 效阮籍每首用原二句起魏

春秋非有託富貴焉常保我本繩樞子飄渺來遠

道植根在天衢託體同小草歷世見盛衰憔悴忽  
稱老雅尚慕黃虞中情矯自好

其二

黃金百鎰盡資用常苦多束髮立朝宁揚袂白駒  
歌往來燕趙郊遊俠時一過忽聞走公卿旋見遭  
網羅仕宦有別逕邈若隔山河謝客甘微尚沉滯  
如余何

其三

遠望令人悲春氣感我心四聖龍馭日往往在山



五言詩集卷之二  
林金華細瞻仰策蹇末駸駸奔迫京口泊春深江  
水淫北鳥集南枝故鄉不可尋天地何能逃淚下  
誰為禁

其四

開軒臨四野登高望所思遠遡沂水源濬發尼父  
書千秋切懷挹古人以為期綠樹蔽岡巒白雲無  
盡時獨絃空哀歌知者其誰之睢睢復于于祇今  
老氏蚩

其五

戰士食糟糠賢者處蒿萊天門極寵餞兩相督師  
崇禎親送  
之承天  
門上何似黃金臺易水咽不流六朝安在哉天  
地無定位青蠅又復來薨薨更夢夢兩宮已塵埃  
勉矣織素手念之令人灰

其六

彎弓挂扶桑長劍倚天外九州湮洪波崇禎八年  
山東洪水  
送流四海揚塵瀨戎馬遍郊野韎韐盛冠帶眇眇在  
林阿緩急不足賴呵護伏聖神環山幾被害從茲  
弃墳墓豈為圖遠大



其七

旗幟何翩翩但聞金鼓鳴馬上奏胡笳六月姑熟  
城膏以明自燃桂以馨炸聲非置矢上弦何以歷  
吳垌兵戈令人老艱難有餘情涉世自不易悔恨  
向誰生

柳鳳詹曰咏懷七作寄託高遠感慨係之覺步  
兵前後二十二首為多

李叔則曰以古調寫今情最難諧合直須透露  
心懷言有餘蘊起古人於今日而為之亦復  
如是作者固難識者亦不易矣

和左思招隱 晉

荒塗深山裏寒暑自古今雲栖何結構依岩覆茂  
林室中何所有抱膝橫鳴琴穆然懷往哲人代聽  
飛沉有酒酌明水無聲乃太音灌木響叢條鳥獸  
時嘯吟此况頗不惡待子共聯襟寤寐不用獨窈  
欲効合簪

其二

出門覽碧阿綠樹曠我神白石映丹菓椽栗密於  
榛因思古偕隱逍遙共樂真世數有澆淳雅尚未  
遂伸不令猿鶴怨肯梯終南津高位為我累榮名



為我塵同人適得已無怨庶成仁流光易弃擲相與携良辰

柳鳳詹曰希聲獨奏記室詩中山水清音一語庶幾擬之

李叔則曰古人招隱遂亦有反招隱者然難進易退隱者之享用似優先生之和太冲可謂一往情深

和謝靈運齋中讀書 宋

昔予櫻世務旅退尋丘壑解組江皋來狎鹿兼馴  
雀芳華甘逝景身世偕寂寞何以銷旅愁草蟲噉  
噉作圭璧媿武公雅不喜戲謔太乙不我照虛聞

天祿閣晚年艱望道讀書自足樂掩卷身後名茲  
事未易託

柳鳳詹曰風格不減謝臨川李叔則曰讀書自得自信語

和沈約詠白雲 梁

白雲馳天上皎皎紛起沒晶日飄微風忽送在城  
闕金氣冉冉秋皓如一片月月色不蔽日雲光自  
陸離上可飛華盖下可蔭咸池武帝歌汾水王母  
謠崑崙垂從來起帝鄉時乘翔六螭

柳鳳詹曰遊神倘恍與江上數峯青同其杳窈李叔則曰逼似古人



和何遜答朱記室 梁

入揚秋幾踐蓬飛  
莼初勁霜鬢照芙蓉  
秋老物華淨悠悠  
海上雲寸心千里  
迥生來散羅綺  
薜荔是本性所貴  
貞明德高歌在梅詠

柳鳳詹曰謾謾松風  
李叔則曰寸心千里迥

句中為經

中有眼所貴貞明德

和謝眺宣城郡內登望 齊

宣郡盛文雅前賢已  
脩狀伏莽弄潢池  
戎行殊方圓依稀  
平楚色低徊各一天  
薑畛明積水栗墟帶

寒煙 宣城出 薄言綢茲郡  
悵望亦屢迂  
青山橫城郭

白水流穀泉戎輅不  
我假暫臨情亦鮮  
哲匠擅風流

股肱寄巖邊千載同  
蒞止景行勝瓊田

柳鳳詹曰緬仰風流神交千古  
李叔則曰先生功在庇民非玄暉所及其虛

懷更感人

癸巳又六月十五日酉時立秋用鮑照園中

秋散韻 宋

候至變夏榮氣交草已殘  
奄忽坐白日月出照孤  
單測景驗秋訊西風颯已寒  
執熱逝欲濯悲涼使



我酸四序涼氣多人生興易闌純扇歌班姬夙昔  
羅綺歡當權畏炙手商調難為彈

柳鳳詹曰諷詠和平風人之旨  
李叔則曰商調難為彈彈者聽者俱有秋思矣

余作秋詩一百五十首不如  
該也先生之簡而

和徐凌山齋陳

山中結小構空谷不見人蒼籐蔓喬栢泉石潔無  
塵有客衣冠古聲氣感上賓鳴鶴聞九天出水鷺  
浴新不逢亦不若四序如三春虎兕守垣墉山鬼  
失其神微抱遂幽絕年代付漢秦

柳鳳詹曰儵然寄傲  
李叔則曰自抒胸臆如見山居之樂

和江總姬人怨陳

空閨螢火上羅衣含照流黃坐偏宜何處蓮芳不  
並蒂誰家匹鳥不集枝挑燈不寐翻嫌短夜深無  
語誰為伴懊惱白苧望江南淒其歡娛腸欲斷

柳鳳詹曰香奩玉臺失其妖豔  
李叔則曰托寄在楮墨之外

和袁朗秋夜獨坐隋

隕籜驚客心堦蟲喞鳴禽俏狀對四壁撫時坐夜  
深仰看星麗繁月照如瑤林感深不能寐聊效梁



甫吟

柳鳳詹曰有繞樹無棲之意豈即所謂商調難為彈乎

李叔則曰淡雋似陶

和虞茂賦昆明織女石 隋

昆明象天漢雲氣共昭回  
支機常糶水劫盡惟見  
灰漢武好神仙延竚織女來  
年年雙蛾歛逢秋始  
一開

柳鳳詹曰遐思遠寄李叔則曰別有所感

和庾信同太寺浮圖 北朝

南京報恩寺永樂為馬太后造西域工

轟轟報慈念凌空憶舊京  
一片琉璃合層級出番  
城俯視雲下起決飛鳥上驚  
一逕危盤轉孤緣道  
念生窓深日不入地遠人無聲  
瓦綠青山映薨丹  
白鷺輕龍行畏舍利仙  
過喜吹笙辨野分星紀  
燃燈似月明高情照漢渚  
頂禮虔皇城今昔共宸眷  
後先儷句清不知同泰塔  
得似梁武情

柳鳳詹曰似伯鸞五噫李叔則曰是懷古不是說塔大作也

和江淹謝僕射混游覽 梁



上宰秉鈞揆神營不自整聊以清讌暇遵途出郊  
省晶晶天宇高矍矍良士永秋氣滌煩襟怡目黃  
花嶺總轡既和鸞返照呈高景機務不我假林泉  
匪言靜曾是司國成玩物喪吾秉帝心紵黃屋大  
匠運風郢

柳鳳簷曰鳳觀帟眎鷹揚其體望之如元龍百尺樓矣

李叔則曰玩物之警大有力暈使人猛省處如秋風入枕簟

與鳳簷祖客失去主人漫紀

共舟出北郭別筵天際頭一水新秋漲雲樹歷歷

浮赤日照四野涼風不可求高橋一借蔭山翠遠  
盈眸彈棊聊共適清言不覺適君能述先德纒纒  
聽不休解纜復北逞飛鳥任悠悠長亭更短亭勞  
勞不自由俎豆不在縣賓筵未適謀惆悵為誰來  
真成汗漫遊

柳鳳簷曰紀事如画李叔則曰先生詩尚質寔一字不為虛設

初秋遊法雲寺登昭明樓看顏真卿題牌與

叔則

閒雲東西馳招提共依依謝寺董祠邊樹古秋色



稀入瞻太傅像眉宇想庶幾雙檜今何在壁題有  
餘暉淝役思意閒天人贊其機功成不受賞出鎮  
在海扉晉室延再造婿隙肆萋菲我來千載後感  
嘆事已遠風流照齊梁昭明書舍魏臨江羅星斗  
校讐盡珠璣君子喜至止小人馳其腓况有魯公  
蹟莊嚴是耶非一日見三異深用慰渴飢

柳鳳簷曰居然一漢魏  
李叔則曰一日三異遊眺始為有得文靖一段  
尤見深情

### 春盡

春盡花都闌春花轉眼看三分春色裏雨雪冒風  
寒雪盡雨纔霽春光又已殫因思四序顯無如春  
光好錦繡看河山飄零嘆衰老人夢屬春婆春早  
邯鄲過

### 四月八

四月初八日我佛如來時萬雷驚江底紛紛海上  
馳烽火連江紅殊非金光漪居人遭寇亂嬾女先  
脫離守者嚴砲具乃在衙門支吾聞守城法不外  
城四垂今此備巷戰好謀豈吾師海氛逾十年日



久烟吐竒大海與長江乘風取厚貲遂令江南地  
半為鯢鯨居我佛不嗜殺何以憫在茲烏精一匙  
飯泫狀普度慈

睡起

夏氣漸困人况我夙善睡清風入牀來拂我不成  
寐起坐據床上無人庭院邃梁間燕呢喃伴我蕭  
然寄十年別故園所語為底事興亡已在眼來去  
自有致豈不念舊巢風煙未得泊旅悶破吟詩幸  
勤如作吏頗有得句時狂來發一醉

贈孔聖裔

善寫竹

五月清風竹三冬積雪寒入君图画裏使我凉心  
肝君原曲阜裔流轉在江干沽酒揚州道埋名騾  
市攢時與屠釣伍豪吟興常寬我亦忝同籍通家  
古人歡淶洙闕里過與可今再看

朱明港

南野茂林樹川原亦逶迤自關逾橋甸杳狀魚鳥  
陂獨木懸危渡青青菜竹漪人家聽犬吠場圃鷄  
鶩馳彷彿武陵圖又似井田遺數家共一圍埂堰



衆所治一穴潰千金大江力不支  
函洞閔蓄洩朽敝難久為我本  
山東人來從江南資五年四水旱  
饑餓日以靡因之懷惴惴命駕以奔馳

其二

迤邐入潮水淼然明一方水遠無弗屆  
泐漫樂未央千耦插隰畛子婦勤且良  
微綠生鵝穉一片白雲鄉沿堤一週視  
長江大且洋焦山竦翠壁眼前隔岸望  
映帶數行柳澹遠逾瀟湘為客遘此景  
信美家難忘况有海氛集不時一輶張  
我生多坎凜

挹挹殊惶惶

相逢行酬吳編脩天石先生

與君十年別相逢黃花時別緒日以長  
遊子悵何之楚水與吳山中多危苦  
詞甲乙丁國步舊都初相知傾蓋即如故  
曾託妻子馳君時辭講筵余適喉舌司  
上帝何夢夢舉國已如披鐘鼓雖仍設  
君王不自持君能達故里予遭亂民笞  
韃官與逃官四字定刑推遍野驚鳴金  
兕童暗指麾天台不可往時欲行  
道天台傍徨在中遠幸免白刃厄旋辱疆場



師致書通區區亦恃夙昔為維時粗戡定再見嘆  
數竒今茲解綬來受廬廣陵湄黃山共白岳跡遠  
心不睽君言在山好失路憶故枝嚼蠟有深語情  
至見贈詩

同太虛在吳見始宅飲月

杯殘席已撤月光初圓潔冬月非秋月千屋萬屋  
雪雪照月光寒使我心神冽犀觥酒復行不飲亦  
不說蟾蜍萬里來處處飛金屑古人對影三今三  
儘堪悅明鏡悲白髮相関情更切漏下成更嚴踏

月佩瓊玦

元宵前一日雪月燈

何冬無此雪此雪殊倍常踰尺照廣陵皎如秋日  
霜何月無明月此月放金光似將雪液浴一洗萬  
里昌亦有上元時豈無點點煌雪月助精神琉璃  
吐屋梁道人秉燭遊心期寥廓翔翻憶昨夕雪濛  
狀不見月月既不東昇燈亦無由揭方謂晦昧時  
錯過上元闕豈料天心轉慧照未曾歇雪在天上  
皎月在地下樾是一是二觀請問作何曰一燈千



平山堂詩集卷之二  
丈紅兩潔使我謁

和叔則 看名勝記

雨雪灑不已蘓暘勝往時餘寒陰猶結春光逗花  
枝萬物行新令吾衰嘆已遲猶幸筆墨親寒來擁  
書帷有時放光怪一編周四陲山河在掌上名勝  
誰得私乃知三千界娑婆儘堪怡吾友今從事幽  
賞得我期

百花生日同太虛叔則共遊梅塢

二月十二日俗名爲

百花生日

百花競生日此日晴明時陰雨寒淒淒一室春光  
移接輿北郭外方知煙景猗森森延萊竹青青麥  
遍陲好鳥弄枝頭散步共逶迤春光何處好梅塢  
一眺之蜀岡西北來樓閣映參差柳色城頭出不  
見堤上垂當其絕盛時山川盡華麗如今數座剝  
點綴無古枝即看梅嶺兀但有遊人嬉大李具慧  
眼把盞咏杜詩小李欲楚遊時時劇秦竒我輩年  
六七安可萬里馳花日不見花遊女惜顏姿將晚  
復進酒四座聽阮披矍相演射圃花月照陸離



李叔則曰逼真一幅龍眠雅集圖一篇文公画記可謂兼之

遊建隆寺有感

建隆前代刹貞觀說重修春日忽載酒春風偶一  
遊古樹參天起黃楊花已稠楊州烟花地一花不  
可謀物當剝後落人際革時愁寥落一二衲破瓦  
不得周嘆息何王建碑版不可求即當零殘時風  
物亦自悠想其全盛日巍峨平山頭城郭相依倚  
豈計半荒丘佛日千年懸廢興不自由地氣有轉  
移人情忽戈矛人情忽戈矛佛面亦包羞

七言古

千佛山

壬子秋考遺才

歷山之南千佛山翠栢峰迴眉黛彎七十二泉紛  
縱橫虛無一點小塵寰手持一卷萬松裏丘壑怡  
情聊自閒落落誰堪轅下駒秋風未起等草管此  
時物色混塵埃五色離迷知者艱此日秋霖肆淫  
雷入城徒步輕往還國家待士非周舊士子紛紛  
思掛綸青山白石不肯住他日移文有汗顏

李叔則曰情足則顯語輕則妙



龍池

龍池一曲歌滄浪沙汀春鳥浴碧芳水雲鬱鬱帶  
城隅阡陌縱橫看渺茫中有小墅分一壑非平非  
午白衣莊如今不見將十載小橋流水曾泛漿聞  
道錦鷄盡飽軍遠望千仞惜鳳凰梨園在否未知  
是吾與兒曹何日翔

李叔則曰音旨鏗狀

郭戚畹

戚畹元后之叔父青宮配位誕東服姊弟笄笄來

上京恩斯鞠斯畹所育畹為錦衣侍震宮 光廟  
潜邸用不副妃子頻呼遊射圃湏錢但道問戚族  
朱提黃袱肯供奉極力趨承媚百福齊化青門大  
道邊連雲甲第槐陰轟郭家金穴世所傳帝室聯  
姻爭推轂三月長安杏苑春遊街跨馬新貴人粉  
榆宴集三十六綺席高張清絕塵齒卑合當置末  
坐聯杯接袂新知晨頻來玉碗私供酒時出白鏹  
資旅貧大寶

神宗臨御久角巾葛服優游身一朝人事不相假



奴婢利財生衆嗔太子婦翁豈有事錦衣散秩寧  
要津蕭牆倉卒彙隙起覆卵破巢絕天倫巢破身  
逃壩上棲元妃遑念叔父親博平侯第舊誰第第  
在人亡觸事新姪滅叔有鬼神華堂日日笙歌陳  
亦知變起柳林長酸辛

李叔則曰紀事之作  
此作與海淀同旨

宿天津

霜飛戎馬天津道畿輔荒殘出塞草大隊笳聲鳴  
向津津門阻水僅能保余從敝車出瀛滄未到京

都形已稿大海洶洶百雉迴遶街驀陌王程早前  
驅已過津河去舟楫塞途使人老旗甲橫行河岸  
裏犯之立斃長篙擣城中驛吏苦無夫駟倒官逃  
行客惱猶憶當年署選時津丞地美要官討十年  
不向長安路狼狽何為不自藻丞苦再三告逼索  
站銀不足供潦倒撫軍憲臬惠顧來日暮停驂敦  
夙好期迫欲過野店宿低徊府二園亭臬竊聞兵  
使尚無宅闔據高衙擁大纛監子從來不典兵忽  
忽永夜誰開抱



李叔則曰紀事詳密輦轂之近如此凄其時非其時詩外之意可悲

### 長春寺

太皇李太后所造閣成高可摩天兩翼蜿蜒  
 如亘長虹麗罕一世出內貯佛牙一顆重十  
 兩舍利子數枚色光殊常香變不一余丁丑  
 正三日隨喜得未曾有因思佛寶流傳世非  
 一代列聖相承惟太后能捨施佛躰散聚蓋  
 亦有緣後數年余允遷南銓聞太后果證九  
 蓮白日降神託皇五子某王而告焉惓惓以

先帝誅戮太多傷國元氣國祚不永為懼后  
 去而五子亦告逝矣此辛巳秋事距甲申只  
 三季耳吁可畏哉誰謂佛道之不靈也

長春寺裏內供奉太后小像肅慈容五十年間太  
 平福慈寧萬壽適與逢含飴弄孫無所事祈福未  
 來佛寺重此寺麗精都下稀流丹飛薨翔雙龍彤  
 雲已換弟昆上春正新皈古佛濃衲子慇懃出至  
 寶焚香閣上禮遺蹤佛牙一箇西域來稀世之寶  
 太府封色護異香似老楠自非天家末由從星星



舍利香塵裏燦燦明光變現溶根器隨人滿風分  
盈虛消息與之共二珍神物不易得累代傳來太  
后供法體遷流自有緣人天輻湊合其宗流傳太  
后是九蓮佛日常懸預吉凶先皇五子神告語不  
信只今惟聞鐘

### 懷柔

懷柔八萬過歸師督撫連鑣秉鉞麾塞上宿將率  
舊闌各分營伍成魚麗

崇禎天子慮不壹頗牧禁中元老宜首相視師如  
天子先生更是肺腑為是時清兵深入來燕趙齊  
魯大半披逐鹿中原蒐獵迴重輜輳載亦已疲莒  
沂頗聽哭泣聲上帝好生厭久馳此日偏軍暗搗  
寨難民大呼可用奇一人一騎不出關范趙青州  
如絡羈秣馬休兵直北上狼烟綿亘照宸居先皇



念亂嚇斯怒遣將調兵焦睿思將將須用宰相行  
先生強為予其咨 相公掀狀拜主辱臣死不

敢辭半夜土門傳密旨護陵又令趙督移土門一  
戰千人去咫尺宸居見疊屍指授紛紛乏方畧棘  
門灞上真兒戲清兵善戰如有神十月中國任蛇  
委雖是歸路還生路呼聲動地三軍墮懷柔八萬  
蕩為塵築就京觀四海唾朝舍出師仍携妓逗遛  
敗後始追隨軍中密議大捷聞百萬賞功朝廷勉  
賞有兵無何處銷就将此物充作私中軍過付騾

車推大帥監軍誰得欺仍是賣官賣獄智藐看先  
帝如小兒懷柔去京能幾舍指鹿為馬真堪悲嗚  
呼四路哭聲天為洩天威已震悞國纍八萬之魂  
訴 上帝先生擁此阿堵泛泛將何之

李叔則曰天地可毀此文不移使我淚泫泫肝  
裂髮豎







